



**Sumáriu Kazu
Tribunál Distritál Dili
Marsu 2022**

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Dili

1. Totál kazu ne'ebé JSMP monitoriza: 10

Artigu	Tipu Kazu	Númeru
Artigu 145 Kódigu Penál (KP) & artigu 2, 3, 35 no 36 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika (VD) sira no artigu 36 kona-ba krime sira violénsia doméstika nian hanesan krime públiku)	5
Artigu 258 KP, artigu 154 KP	Danu simples no maus-tratus ba kónjuje	1
Artigu 316 KP	Kontra bandu	1
Artigu 181 KP	Ezibisionizmu seksuál	1
Artigu 23 & 172 KP	Tentativa violasaun seksuál	1
Artigu 174 KP, 145 KP & artigu 2, 3, no 35(b) no 36 LKVD	Explorasaun seksuál, ofensa ba integridade física simples ho natureza violénsia doméstika.	1

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77040735

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

Totál		10
--------------	--	-----------

2. Totál desizaun ne'ebé JSMP monitoriza :8

Tipu desizaun	Artigu	Númeru
Suspensaun ba prizaun nia ezekusaun	68 KP	2
Pena multa	67 KP	4
Pena admoestasaun	82 KP	1
Omologa dezisténsia keixa no absolve	216 KPP	1
Totál		8

3. Totál kazu ne'ebé sei kontinua prosesu tuir JSMP nia monitorizasaun: 2

B. Deskrisaun sumariu julgamentu ba desizaun kazu sira

1. Krime ofensa ba integridade fizika simples ho natureza violénsia doméstika

Nú. Prosesu : 0023/21.DINFT
 Kompozisaun Tribunál : Singulár
 Juis : Dr. José Gonçalves
 Prokurador : Dr. Hernanio Rangel
 Defeza : Dra. Joana Christina Pinto
 Desizaun : Pena multa US\$70.00

Iha 10 Marsu 2022, Tribunál Distritál Dili prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu HDG hasoru nia feen, iha Munisípiu Dili.

Akuzasaun Prokuradór

Prokuradór akuza katak iha 20 Juñu 2021, maiszumenus iha tuku 10:30 dadeer, arguidu rasta lezada tama ba uma laran taka tiha odamatan, tuku dala ida iha lezada nia matan laran, tuku dala ida iha lezada nia kotuk laran kontinua kaer lezada nia fuuk riba ba sumente, halo lezada sente moras maka'as to'o tanis. Antes agresaun ne'e, arguidu ho lezada diskute malu kona-ba lezada foti roupa foer atu ba fase iha mota, maibé arguidu la hatan lezada ba mesak tanba dook, ho nune'e mosu agresaun hirak

ne'e. Konsekuensia husi arguidu nia hahalok ne'e halo lezada nia matan laran metan to'o bubu no sente moras maka'as iha parte matan laran no kotuk laran.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penal too tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu arguidu konfesa faktu hotu iha akuzasaun, arrepende ona nia hahalok no iha dia 25 Dezembru 2021, arguidu ho lezada ba monu ain fali no husu deskulpa ba lezada nia inan aman no família sira no promete sei la komete tan aktu refere iha futuru.

Alende ne'e, lezada mós konfirma faktu hotu iha akuzasaun no konfirma mós ho arguidu ninia deklarasaun katak, depoisde akontesimentu ne'e arguidu ho lezada ba husu ona deskulpa ba lezada nia inan aman no família sira.

Alegasaun finál

Prokuradór haktuir katak, arguidu konfesa faktu hotu iha akuzasaun no arrepende ona nia hahalok, haree ba sirkunstánsia atenuante sira hanesan arguidu foin primeiravés mai hatan iha tribunál, tanba ne'e husu ba tribunál atu aplika pena multa ba arguidu tuir arguidu nia nesesidade.

Alende ne'e defeza haktuir katak arguidu konfessa integralmente ba faktu hotu ne'ebé konsta iha akuzasaun tanba ne'e husi parte defeza konkorda ho prokuradór nia alegasaun katak atu aplika pena multa ba arguidu tuir nia nesesidade.

Desizaun

Depoisde avalia faktu hotu, tribunál prova katak arguidu rasta lezada tama ba uma laran taka tiha odamatan, tuku dala ida iha lezada nia matan laran, tuku dala ida iha lezada nia kotuk laran kontinua kaer lezada nia fuuk riba ba sumente, halo lezada sente moras maka'as to'o tanis arguidu rasta lezada tama ba uma laran taka tiha ormatan, tuku dala ida iha lezada nia matan laran, tuku dala ida iha kotuk laran kontinua kaer fuuk riba ba sumente, halo lezada sente moras maka'as to'o tanis.

Bazeia ba faktu provadu sira hirak ne'e hotu no tetu mós ho sirkunstánsia atenuante sira hanesan arguidu konfesa, arrepende ona nia hahalok no foin primeiravés mai hatan iha tribunál no haree mós katak agora dadaun estudante hela, tanba ne'e tribunál kondena arguidu ho pena multa US\$70.00, ne'ebé arguidu sei selu 0,50 kada loron,

durante loron 140. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

2. Krime ofensa ba integridade fízika simples ho natureza violénsia doméstika

Nú. Prosesu : 0038/20.ERERM
Kompozisaun Tribunál : Singulár
Juis : Dra. Erçilia de Jesus
Prokuradór : Dr. Simeão Brites
Defeza : Dr. João de Carvalho
Desizaun : Pena admoestasaun

Iha 17 Marsu 2022, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AdN hasoru nia feen, iha Munisípiu Ermera.

Akuzasaun Prokuradór

Prokuradór akuza katak iha 24 Outubru 2020, iha oras tuku 21:30 kalan, bainhira lezada ho nia oan sira fila ba uma, arguidu hasoru sira iha dalan klaran, iha hasoru malu ne'e arguidu ko'alia barak no dudu lezada monu ba rai lolon, arguidu nia asaun ne'e halo lezada ho nia oan ne'ebé sei kiik tauk no hakilar depois viziñu sira mak sai ba ajuda lezada ho nia oan sira. Kazu ne'e akontese bainhira udan boot lezada kous nia oan ba fali lezada nia bin nia uma kalan boot.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penal too tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun, arrepende ona nia hahalok, diak malu ona ho lezada no promete sei la komete tan krime hanesan iha futuru.

Alende ne'e, lezada kontinua konfirma faktu hotu iha akuzasaun no deklarara katak depoisde akontesimentu ne'e diak malu ona ho arguidu.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no konfirma mós husi lezada, nune'e atu prevene krime hanesan akontese tan iha futuru husu ba tribunál atu kondena arguidu ho pena adomestasaun.

Alende ne'e defeza mós husu ba tribunál atu kondena arguidu ho pena admoestasaun ho konsiderasaun sira katak arguidu konfesa, arrepende nia hahalok, diak malu ona ho lezada no promete sei la komete tan krime hanesan iha fufturu.

Desizaun

Depoisde avalia faktu hotu, tribunál prova katak bainhira lezada ho nia oan sira fila ba uma, arguidu hasoru sira iha dalan klaran, iha hasoru malu ne'e arguidu ko'alia barak no dudu lezada monu ba rai lolon, arguidu nia asaun ne'e halo lezada ho nia oan ne'ebé sei kiik tauk no hakilar depois viziñu sira mak sai ba ajuda lezada ho nia oan sira.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ona nia hahalok, diak malu ona ho lezada no promete sei la komete tan krime hanesan iha futuro, ho nune'e tribunál konklui prosesu ne'e no kondena arguidu ho pena admoestasaun.

3. Krime danu simples no maus-tratus ba kónjuje ho natureza violénsia doméstika

Nú. Prosesu : 0012/19.ERATB
Kompozisaun Tribunál : Koletivu
Juis : Dr. Evangelino Belo, Dr. Afonso Carmona, Dra. Erçilia de Jesus
Prokuradór : Dr. Simeão Brites
Defeza : Dr. João de Carvalho
Desizaun : Pena prizaun fulan 3 suspende ba tinan 2

Iha 17 Marsu 2022, Tribunal Distritál Dili prezide julgamentu leitura akordaun ba krime danu simples, maus-tratus ba kónjuje ho natureza violénsia doméstika, ne'ebé envolve arguidu MG hasoru nia feen, iha Munisípiu Ermera.

Akuzasaun Prokuradór

Prokuradór akuza katak iha 2 Setembru 2019, iha oras tuku 19:30 kalan, bainhira lezada fila husi hanorin ba uma odamatan oin xave metin hotu, ho nune'e lezada ho nia banin feto deside tama husi odamatan kotuk, bainhira han kalan hotu atu toba, arguidu mai ho kondisaun lanu todan hamrik iha uma oin tolok lezada ho liafuan ne'ebé ladiak, tanba tauk lezada ho nia banin feto deside halai liu odamatan kotuk, maibé arguidu hein ona iha ormatan kotuk nune'e arguidu buti lezada nia kakorok no dudu lezada monu ba rai, lezada atu halai ba toba iha viziñu nia uma, arguidu ameasa dehan “ *ó halimar hau oho mate ó*”.

Tuir mai iha oras tuku 02:00 madrugada, arguidu sunu hotu lezada nia diploma no sertidaun RDTL, depoisde sunu arguidu kontinua tuku dala 2 iha lezada nia ulun, lezada halai arguidu foti fatuk atu tuda, maibé viziñu sira mak sori netik. Lezada mós haktuir katak durante ho arguidu moris hamutuk arguidu sempre baku lezada no hatudu atitude ne'ebé ladiak ba lezada. Konsekuensia husi arguidu nia hahalok ida ne'e halo lezada sente trauma to'o agora.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penal tinan 2 too tinan 6 prizaun no artigu 258 KP kona-ba danu simples ho moldura penal tinan 3 ka multa.

Produsaun ba prova sira

Iha prosesu julgamentu arguidu hili direitu nonook. Entretantu lezada konfirma faktu hotu iha akuzasaun no deklarata katak agora dadaun sira diak malu ona.

Alegasaun finál

Prokuradór haktuir katak mezmú arguidu hili direitu nonook, maibé lezada konfirma faktu hotu iha akuzasaun, nune'e prokuradór konsidera arguidu provadu komete krime hasoru lezada no husu ba tribunál atu kondena arguidu ba danu simples ho pena prizaun tinan ida suspende ba fulan neen no ba krime maus-tratus ba kónjuje kondena arguidu ho pena tinan rua prizaun suspende ba tinan rua no pena únika tinan tolu prizaun no suspende ba tinan rua.

Entretante defeza haktuir katak iha produsaun ba prova arguidu hili direitu nonook no lezada konfirma faktu hotu iha akuzasaun, nune'e husu ba tribunál atu kondena arguidu tuir konviksaun tribunál nian.

Desizaun

Depoisde avalia faktu hotu tribunál prova katak bainhira lezada fila husi hanorin ba uma odamatan oin xave metin hotu, ho nune'e lezada ho nia banin fetó deside tama husi odamatan kotuk, bainhira han kalan hotu atu toba, arguidu mai ho kondisaun lanu todan hamrik iha uma oin tolok lezada ho liafuan ne'ebé ladiak, tanba tauk lezada ho nia banin fetó deside halai liu odamatan kotuk, maibé arguidu hein ona iha ormatan kotuk nune'e arguidu buti lezada nia kakorok no dudu lezada monu ba rai, lezada atu halai ba toba iha viziñu nia uma, arguidu ameasa dehan “*ó halimar hau oho mate ó*”.

Bazeia ba faktu provadu hirak ne'e, tribunál konklui prosesu ne'e no kondena arguidu ho pena prizaun fulan tolu suspende ba tinan rua.

4. Krime ofensa ba integridade fízika simples ho natureza violéncia doméstika

Nú. Prosesu : 0188/21.PNSIC
Kompozisaun Tribunál : Singulár
Juis : Dr. Evangelino Belo
Prokuradór : Dr. Napoleão da Silva
Defeza : Dr. Sergio Quintas
Desizaun : Pena multa US\$60.00

Iha 17 Marsu 2022, Tribunál Distritál Dili prezide julgamentu leitura sentensa ba krime ofensa ba integridade fízika simples ne'ebé envolve arguidu JP hasoru nia feen, iha Munisípiu Dili.

Akusazaun prokuradór

Prokuradór akuza katak iha 24 Agostu 2021, iha oras tuku 09:50 dadeer, arguidu tuku dala ida iha lezada nia knosen parte loos. Antes agresaun ne'e, arguidu ho lezada diskute malu kona-ba atu halo sintina fatin, ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penal too tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha produsaun ba prova, arguidu konfesa faktu hotu iha akuzasaun, arrepende ona nia hahalok no promete sei la komete tan krime seluk iha futuru.

Alende ne'e, lezada konfirma faktu hotu iha akuzasaun no deklara katak lakohi perdua arguidu, tanba lezada haktuir desde hola malu husi tempu Indonézia arguidu baku bebeik lezada, maibé nunca hato'o keixa no foin problema ida ne'e mak lori mai tribunál.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós husi lezada no lezada mós deklara katak durante hola malu arguidu sempre halo agresaun fízika hasoru lezada, tanba ne'e husu ba tribunál atu aplika pena prizaun tinan 3 suspende ba tinan 5.

Entretantu defeza husu ba tribunál atu kondena arguidu ho pena ne'ebé adekuadu ho konsiderasaun, arguidu konfesa, arrepende nia hahalok, haktuir no promete sei la komete tan krime hanesan iha futuru, tanba ne'e husi parte defeza husu atu aplika pena ne'ebé justu no adekuadu ba arguidu.

Desizaun

Depoisde avalia faktu hotu, tribunál prova katak arguidu tuku dala ida iha lezada nia knosen parte loos.

Bazeia ba faktu provadu sira ne'e no tetu mós sirkunstánsias atenuante sira hanesan arguidu konfesa, arrepende nia hahalok no promete sei la komete tan krime hanesan iha futuru, ho nune'e tribunál konklui prosesu ne'e no kondena arguidu ho pena multa US\$60.00, ne'ebé arguidu sei selu US\$1.00 kada loron, durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

5. Krime ofensa ba integridade física simples ho natureza violéncia doméstika

Nú. Prosesu : 0116/21.DIDIL
Kompozisaun Tribunál : Singulár
Juis : Dr. Argentino Nunes
Prokuradór : Dr. Hernanio Rangel
Defeza : Dra. Joana Christina Pinto
Desizaun : Omologa dezisténcia keixa no absolve

Iha 17 Marsu 2022, Tribunál Distritál Dili prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu MSP hasoru nia feen, iha Munisípiu Dili.

Akuzasaun prokuradór

Prokuradór akuza katak ihá 9 Jullu 2021, iha oras tuku 21:00 kalan, arguidu basa dala haat iha lezada nia hasan parte loos no karuk, hikis liman kona iha lezada nia reen-toos no matan, rezulta lezada nia matan bubu, konsekuensia husi arguidu nia hahalok ne'e rezulta lezada sente moras maka'as iha hasan parte loos no karuk no matan laran. Antes agresaun ne'e arguidu ho lezada diskute malu kona-ba lezada sai husi uma dehan atu ba sosa modo, maibé ba fali lezada nia inan aman nia um. Ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál too tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu deklara katak faktu hotu ne'ebé akuza ba arguidu ne'e loos hotu, arguidu mós deklara katak iha akontesimentu ne'e lezada mak tuku uluk arguidu nia ibun, la simu ho hahalok lezada nian, nune'e arguidu komete aktu hirak ne'e hasoru lezada. Arguidu deklara liután katak depoisde akontesementu ne'e husu ona diskulpa ba lezada no promete sei la komete tan krime hanesan hasoru lezada iha futuru.

Alende ne'e, lezada mós konfirma faktu hotu iha akuzasaun no konfirma mós ho arguidu nia deklarasaun katak lezada mak tuku uluk arguidu, ho nune'e arguidu halo agresaun ne'e hasoru lezada, lezada deklarala liután katak diak malu ona ho arguidu.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós husi lezada, nune'e husu ba tribunál atu kondena arguidu tuir konviksaun tribunál nian.

Entretantu defeza haktuir katak agresaun ne'e mosu, tanba lezada mak tuku uluk arguidu, mezmu nune'e arguidu husu ona diskulpa ba lezada no promete sei la komete tan krime hanesan iha futuro.

Desizaun

Depoizde avalia faktu hotu, tribunál konsidera katak krime ne'e akontese tanba lezada mak tuku uluk arguidu, mezmu nune'e arguidu husu ona deskulpa ba lezada no promete sei la komete tan krime hanesan iha futuro, ho nune'e tribunál konklui prosesu ne'e no absolve arguidu husi prosesu ne'e.

6. Krime ofensa ba integridade fízika simples ho natureza violénsia doméstika

Nú. Prosesu : 0127/21.DIBCR
Kompozisaun Tribunál : Singulár
Juis : Dr. Argentino Nunes
Prokuradór : Dr. Napoleão da Silva
Defeza : Dra. João de Carvalho
Desizaun : Pena multa US\$45.00

Iha 23 Marsu 2022, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MdA hasoru nia feen, iha Munisípiu Dili.

Akuzasaun prokuradór

Prokuradór akuza katak iha 27 Maiu 2021, iha oras tuku 8:50 dadeer, arguidu foti fatuk tuda lezada, maibé lakona tanba ema sori tiha, hafoin arguidu kaer lezada nia fuuk dulas, rakut lezada nia kakorok no basa lezada niaibun. Antes agresaun ne'e, arguidu ho lezada diskute malu kona-ba arguidu husu osan 10 sentavus atu sosa sosis maibé lezada la fó, ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál too tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu hotu ne'ebé akuza ba arguidu ne'e loos hotu, arrepende ona nia hahalok no promete sei la komete tan krime hanesan hasoru lezada.

Alende ne'e, lezada kontinua konfirma faktu hotu iha akuzasaun no deklara katak diak malu ona ho lezada.

Alegasaun finál

Prokuradór haktuir katak, arguidu konfesa faktus hotu signifika katak arguidu provadu komete krime hasoru lezada, nune'e husu ba tribunál atu kondena arguidu ho pena prizaun fulan tolu suspende ba tinan ida fulan neen.

Entretantu defeza husu ba tribunál atu kondena arguidu ho pena admoestasaun ho konsiderasaun sira katak, arguidu konfesa, arrepende nia hahalok no promete sei la komete tan hahalok hanesan iha futuru.

Desizaun

Depoisde avalia faktu hotu, tribunál prova katak arguidu foti fatuk tuda lezada, maibé lakona tanba ema sori tiha, hafoin arguidu kaer lezada nia fuuk dulas, rakut lezada nia kakorok no basa lezada nia ibun.

Bazeia ba faktu provadu hirak ne'e no tetu mós ho sirkunstánsia atenuante sira hanesan, arguidu konfesa, arrepende nia hahalok, di'ak malu ona ho lezada nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu 0,50 sentavus kada lora durante lora 90. Tribunál mós fiksa pena alternativa durante lora 60 prizaun, bainhira arguidu la kumpri pena multa refere.

7. Krime kontra bandu

Nú. Prosesu	: 0016/19.LIMBR
Kompozisaun Tribunál	: Koletivu
Juis	: Dr. Alvaro Freitas, Dr. José Gonçalves, Dr. Argentino Nunes
Prokuradór	: Dr. Aderito Tilman
Defeza	: Dr. João de Carvalho
Desizaun	: Pena multa US\$60.00

Iha 24 Marsu 2022, Tribunál Distritál Dili prezide julgamentu leitura akordaun ba kazu krime kontra Bandu ne'ebé involve arguidu Armando Soares no Irma de Jesus hasoru Estado RDTL, iha Munisípiu Likisá.

Akuzasaun Prokuradór

Prokuradór akuza katak iha 9 Jullu 2019, iha oras tuku 12:00 kalan, arguidu nain rua kontaktu malu ho sidadaun iha Indonézia ne'ebé hela iha Atapupu, hodi lori tama mina rai illegal iha área Loes. Bainhira Roó para iha área Sabalau Maubara Polísia ne'ebé halo patrulhamentu iha área ne'eba halo kedas aprensaun ba arguidu nain rua ho evidensia hanesan mina rai litru lima iha masa 84 no mina rai 20 litru iha masa 60. Totál husi mina rai hirak ne'e hola parte husi arguidu Armando Soares nian mak litru 960 no arguida Irma de Jesus nian litru 1200.

Prokuradór akuza arguidu sira kontra artigu 316 KP kona-ba krime kontra bandu ho moldura penal tinan 2 too tinan 6 ka multa.

Produsaun ba prova sira

Iha prosesu julgamentu, arguidu sira konfesa faktu hotu iha akuzasaun no deklarasaun mós katak arrepende ona sira nia hahalok no promete sei la komete tan krime hanesan iha futuru.

Alegasaun finál

Prokuradór haktuir katak arguidu nain rua provadu komete krime kotra bandu bazeia ba konfisaun arguidu sira nian, nune'e atu prevene krime hanesan akontese tan iha futuru, husu ba tribunál kondena arguidu sira ho pena prizaun tinan tolu suspende ba tinan tolu, no husu atu mina ne'ebé prende entrega ba estadu.

Enkuantu husi parte defeza husu ba tribunál atu kondena arguidu nain rua tuir konviksaun juis nian ho konsiderasaun sira katak arguidu nain rua konfesa ba faktu hotu, arrepende sira ninia hahalok no promete sei la komete tan aktu hanesan iha futuru.

Desizaun

Depoisde avalia faktu hotu, tribunál prova katak arguidu nain rua pratika duni krime kontra bandu hanesan saida mak konsta iha akuzasaun tuir deklarasaun arguidu nain rua nian durante produsaun ba prova.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu sira konfesa, arrepende ona sira nia hahalok no promete sei la komete tan krime hanesan iha futuru. Ho nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu 0,50 sentavus durante loron 120. Tribunál mós fiksa pena alternativa durante loron 40 prizaun, bainhira arguidu sira la selu pena multa refere.

8. Krime tentativa violasaun seksuál

Nú. Prosesu : 0026/20.ERHAT

Kompozisaun Tribunál : Koletivu

Juis : Dra. Ana Paula Fonseca, Dra. Zulmira da Silva Barros,

Dra. Maria Solana
Prokuradór : Dr. Simeão Brites
Defeza : Dr. Manuel Tilman
Desizaun : Pena prizaun tinan 3 suspende ba tinan 5

Iha 28 Marsu 2022, Tribunál Distritál Dili prezide julgamentu leitura akordaun ba krime tentativa violasaun seksuál ne'ebé envolve arguidu RMP hasoru lezada AB, iha Munisípiu Ermera.

Akuzasaun prokuradór

Prokuradór akuza katak iha 10 Dezembru 2020, iha oras tuku 15:30 lokraik, lezada fila husi eskola atu hakur mota lezada hasoru arguidu komprimenta tiha, derepente deit arguidu kaer lezada nia orgaun sensitivu no rei lezada, hafoin lezada hakilar, testemuña ne'ebé atu hakur mota halai ba haree arguidu halo hela ninia asaun hasoru lezada, nune'e sasin hakilar no arguidu halai kedas, lezada ba hato'o kedas ba lezada nia inan aman.

Prokuradór akuza arguidu kontra artigu 23 KP no artigu 172 KP kona-ba tentativa violasaun seksuál ho moldura penal tinan 5 too tinan 15.

Produsaun ba prova sira

Iha julgamentu, arguidu deklara katak antes ne'e gosta duni lezada no iha duni tentasaun atu halo asaun ne'e hasoru lezada, maibé la konsegue realiza, tanba testemuña hakilar no arguidu halai tiha, nune'e arguidu konsidera faktu ne'ebé hakerek iha akuzasaun laloos.

Iha parte seluk, lezada konfirma faktu hotu iha akuzasaun no deklara mós katak antes ne'e arguidu dehan ba lezada katak gosta lezada no prontu atu selu lezada nia eskola, maibé lezada lakohi, tanba arguidu ho lezada sei iha relasaun família no lezada nia inan ho arguidu uma lisan ida deit.

Testemuña mós depoimenta katak faktu ne'ebé hakerek iha akuzasaun ne'e loos hotu, bainhira testemuña hakilar mak arguidu foin halai.

Alegasaun finál

Prokuradór konsidera arguidu provadu komete krime hasoru lezada, mezmú arguidu tenta atu nega faktu balun, maibé lezada no testemuña konfirma faktu hotu iha akuzasaun, nune'e husu ba tribunál atu kondena arguidu ho pena prizaun tinan rua suspende ba tinan tolu.

Alende ne'e, defeza laiha opsaun seluk no konkorda ho prokuradór nia alegasaun atu kondena arguidu ho pena prizaun maibé suspende ninia ezekusaun.

Desizaun

Depoisde avalia faktu hotu, tribunál prova katak arguidu provadu komete krime tuir akuzasaun prokuradór nian. Bazeia ba faktu provadu hirak ne'e, tribunál konklui prosesu ne'e no kondena arguidu ho pena prizaun tinan tolu suspende ba tinan lima.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl